

# **Visoki predstavnik poduzeo mјere kako bi omogućio funkcioniranje gradskih službi Mostara i sankcionirao vijećnike**



Visoki predstavnik Valentin Inzko je danas donio Odluku kojom se produžava period privremenog financiranja Grada Mostara od 1. aprila do 30. septembra. Odluka omogućava isplatu plata i ostalih naknada zaposlenicima Grada Mostara kao što su službenici, vatrogasci i ostali uposlenici Grada.

Odluka se ne primjenjuje na plate i naknade vijećnika Grada Mostara ili na financiranje i ostala plaćanja političkim strankama ili parlamentarnim grupama, koje su isključene iz Odluke visokog predstavnika o privremenom financiranju. Na osnovu Odluke, vijećnici i političke stranke će morati čekati da novi gradonačelnik bude izabran i da Vijeće Grada Mostara usvoji budžet, prije nego što budu isplaćeni.

Objašnjavajući svoju odluku, visoki predstavnik Inzko je rekao: «Ponašanje vijećnika u Mostaru i njihovih političkih stranaka je doseglo vrhunac cinizma i neprihvatljivo je. Njihov neuspjeh da izaberu gradonačelnika i osiguraju osnovu za kontinuirano financiranje gradskih službi prouzrokovao je nepotrebne patnje za građane Mostara, doveo ih u tešku situaciju i na taj način ugrozio živote. Ne vidim razlog zašto bi gradski vijećnici i političke stranke bili plaćeni ako neće raditi posao za koji su izabrani, a oni koji zaista rade, kao hrabri vatrogasci, ne primaju plate mjesecima. Plate se daju

za rad, a ne za nerad. Vijećnici su od građana dobili mandat da izaberu gradonačelnika, a to nisu uradili».

Vijeće se više čak i ne pretvara da održava sjednice, a stranke nikada nisu započele ozbiljne pregovore nego su pokušale okriviti Statut za svoju političku letargiju. «Neki vijećnici su čak otišli i na godišnji odmor», rekao je visoki predstavnik. «S druge strane, situacija u kojoj se nalaze zaposlenici gradskih službi i stanovnici Mostara je neodrživa i morao sam nešto učiniti kako bih institucijama vratio mogućnost da pružaju usluge u Mostaru».

Ovom odlukom se izabrani vijećnici ne oslobađaju obaveze da izaberu gradonačelnika ili obaveze da nakon toga usvoje budžet Grada. «Sada je u njihovom vlastitom interesu da što hitnije imenuju gradonačelnika i usvoje budžet kako bi primili plate», rekao je visoki predstavnik. «Da bih osigurao da zaposlenici Grada više ne budu taoci političara, odlučio sam produžiti privremeno financiranje, što će osigurati isplatu neisplaćenih plata do 30. septembra i skoro normalno funkcioniranje grada, sportskih i sličnih događaja».

Visoki predstavnik se zahvaljuje svim službenicima Mostara koji su nastavili profesionalno obavljati svoj posao usprkos tome što nisu dobili ni jednu platu tokom proteklih mjeseci. «Ukoliko političari u Mostaru ne iskoriste dodatno vrijeme koje im moja odluka daje da bi razriješili situaciju u Mostaru, nije isključeno poduzimanje dodatnih mjera», rekao je Valentin Inzko.

Odluka kojom se donosi Zakon o dopuni Zakona o budžetima u Federaciji Bosne i Hercegovine

Odluka kojom se donosi Zakon o dopuni Zakona o principima lokalne samouprave u Federaciji Bosne i Hercegovine

Odluka o produženju privremenog finansiranja Grada Mostara za period od 1. aprila 2009. godine do 30. septembra 2009. godine